

李文忠公奏稿

李文忠公奏稿

卷之五十一 目錄

展收鹽斤加價摺

光緒十年五月十二日

學生陳伯章請卹摺

光緒十年五月十二日

劉銘傳抵津摺

光緒十年五月二十日

吳長慶請假摺

光緒十年五月二十日

出洋巡閱摺

光緒十年五月二十七日

辦理鳳河工程摺

光緒十年閏五月初七日

出洋巡閱情形摺

光緒十年閏五月初七日

代奏朝王謝摺

光緒十年閏五月初七日

京城平糶摺

光緒十年閏五月初十日

力籌戰備摺

光緒十年閏五月十三日

覆陳後路布置片

光緒十年閏五月十三日

覆奏各口礮臺工程片

光緒十年閏五月十三日

覆陳使命約文情形片

光緒十年閏五月十三日

練軍剿匪獲勝摺

光緒十年閏五月二十五日

淮軍修造師船片

光緒十年閏五月二十五日

吳長慶請卹摺

光緒十年六月初二日

吳保初剋肉療親片

光緒十年六月初二日

遵賞各營丹藥摺

光緒十年六月十五日

陵樹撥銀展限摺

光緒十年六月十五日

易州旗丁試辦鹽菜片

光緒十年六月十五日

整頓蘆鹽摺

光緒十年六月十五日

請撥江漢關洋稅摺

光緒十年六月十八日

代擬口外剿賊情形摺

光緒十一年六月二十三日

覆陳商局輪船暫售美國摺

光緒十年六月三十日

李文忠公奏稿卷五十

全集一之五十

桐城吳汝綸編錄

展收鹽斤加價摺

光緒十年五月十二日

奏為展收直岸鹽斤加價以恤商艱而裨賑款恭摺具

奏仰祈

聖鑒事竊長蘆行銷直岸引鹽前因運本過重商累太深

奏准自同治十三年六月起每斤加賣價制錢二文五年為限稍資津貼嗣經國子監司業汪鳴鑾擬推展蘆商賣鹽加價以助直賑飭據運司議自光緒五年六月起將加價展限五年每年交銀二萬兩共合十萬兩彌補直賑不敷之款亦經

奏准在案計扣至本年五月止五年限滿飭據運司額勒精額詳稱直岸商人楊俊元等以引岸疊遭災歉商困益深賑款未能交

足請再將加價展限五年該司查自光緒五年六月起每年僅能交賑款銀一萬二三千兩迄今共僅交銀六萬八千餘兩按原議十萬兩之數尙短銀三萬一千餘兩實因疊遭災歉本重運艱銷路益滯連歲大祲之餘灘鹽多被淹沒肅疎亦復失收車船腳價無不昂貴各商極形疲累是以未能交足此項賣鹽加價原因近年迎本過重稍資調劑初非提銀歸公他省亦有因商累加價貼補之案約計民戶每人日食鹽三錢每月僅多費制錢一文零尙不至於病民而課款得資周轉該司悉心體察現值商情異常艱窘加價驟難議停且賑務既未截止每屆冬令貧民來津求食者絡繹不絕留養遺歸均需巨款請自光緒十年六月起直岸賣鹽加價展限五年仍責令每年交銀二萬兩除撥歸上屆未補銀三萬一千餘兩其餘俱交籌賑局存備以後冬撫要需既於商困稍

紆窮黎亦沾實惠洵屬兩有裨益等情具詳請

奏前來臣覆查無異相應懇

天恩俯准照辦以恤商銀而裨賑款理合恭摺具陳伏乞

皇太后

皇上聖鑒訓示謹

奏

學生陳伯璋請卹片

光緒十年五月十二日

再准出使德國大臣李鳳苞咨稱出洋學生五品軍功候選從九品陳伯璋係閩廠繪事院畫董素肯力學出洋後派在魚雷廠無閒寒暑倍加攻苦惟時以不能精進爲憾遂致積成憂憤於光緒九年正月初九日在法國寓次身故並由船政大臣核明咨請照章奏卹前來臣查光緒二年奏定選派船政生徒出洋肄業章程內開各生因攻苦積勞致有不測之事酌量奏卹等因今陳伯璋選派出洋數年學業漸有成效遽因攻苦憂憤殞志以致殊堪憫惻相應據情奏懇

天恩俯准敕部議卹以慰精魂謹會同船政大臣詹事府少詹事臣何如璋附片陳請伏乞

聖鑒訓示謹

奏

劉銘傳抵津摺

光緒十年五月二十日

奏爲提督劉銘傳遵

旨北上現已抵津恭摺仰祈

聖鑒事竊臣接准軍機大臣字寄光緒十年三月二十六日奉
上諭前直隸提督劉銘傳統兵有年威望素著前患目疾諒已就
痊現值時事艱難需材孔亟著李鴻章傳知該提督即行來京陛
見以資任使等因欽此當即恭錄

諭旨飛咨該提督欽遵期赴京銷假旋接劉銘傳函稱入夏以
來目疾紅腫漸輕而昏蒙如舊畏見風日惟值時局艱難仰承
明詔自當力疾就道定於五月初二日由籍起程航海北上茲於
二十日行抵天津適張佩綸前往福建道出此間與臣熟商閩海
防務該提督深悉戰守機宜彼此互相討論小住數日即晉京展

覲泥首

闕廷以伸積年瞻就之忱所有劉銘傳奉

召抵津剋日來京緣由謹繕摺由驛馳報伏乞

皇太后

皇上聖鑒謹

奏

吳長慶請假片

光緒十年五月二十日

再廣東水師提督吳長慶一軍前奉

寄諭令臣酌量調回臣已奏明暫留三營駐防朝鮮卽飭吳長慶

撤回三營擇要扼守在案旋商令吳長慶馳赴奉天沿海金州地

方查勘形勢尙覺空虛檄調該軍親兵慶字前營中營正營於五

月十一日由朝鮮乘坐商輪駛抵金州劉家屯一帶布置扼紮該

提督近年在朝鮮營次積受風寒遂得喘嗽之證春間來津與臣

籌商軍事卽訝其病值異常適值海防喫緊該提督往來洋面涉

歷風濤舊恙增重抵金州以後咯血喘逆夜不能寐元氣大虧幾

有虛脫之象咨請轉奏

賞假一月俾得在營安心調理等因臣查吳長慶久戍朝鮮積勞

致疾茲患病加重深堪憫念除遣醫前往診視諄屬靜心調養外

應請

旨准假一月在營調理伏乞

聖鑒訓示謹附片具

奏

出洋巡閱摺

光緒十年五月二十七日

奏為微臣出洋巡閱以重海防恭摺仰祈

聖鑒事竊維渤海大勢

京師以天津為門戶天津以旅順煙臺為鎖鑰臣歷年經營海防先治大沽北塘礮臺以固隩區復築新城以為後拒而海防經費各省關歷屆短絀臣以為常以致購器築臺規模遽難遠拓上年旅順口礮臺募用洋匠仿造新式工作既成觀者均目為堅實電纜魚雷駁駛及山東之威海矣吳大澂新承

簡命會辦北洋適張之洞張佩綸先後過津均欲整頓閩粵海防以非洋略有其緒可尋就臣討論臣雖久更兵事而衰朽之餘智慮短絀亦冀與二三英俊反復考究以輔臣之不逮擬即於本月二十八日乘坐輪船駛赴旅順煙臺等處巡閱水陸各軍會同張

之洞等前往研究洋防審察形勢互收攻錯之益以紓

朝廷睠顧遼海之意屆計程途往返不過八日起程後所有地方

日行公事仍飭藩司代印代行通商尋常事件即交津海關道就

近代行如有

寄諭及緊要事件即由津交輪船轉遞一二日可達並無遲誤所

有微臣出洋巡閱日期理合恭摺馳

奏伏乞

皇太后

皇上聖鑒謹

奏

辦理鳳河工程摺

光緒十年閏五月初七日

奏為順直鳳河工程剋期挑築完竣恭摺仰祈

聖鑒事竊查鳳河發源

南苑山五空閘流出苑牆經大興東通州武清遼津歸海工長二百餘里關係沿河民田利害而下游東隄尤為津武一帶保障疊經臣籌款津貼修築惟當永定河之衝屢有潰漫其上游河身亦因年久淤墊遂致泛濫為災去冬臣等各派委員察勘籌議挑築並因文傾之奏經府尹臣將大概情形奏蒙

聖鑒聲明以工代辦在案今春臣復遴派候補知府惲桂孫周厯上下游詳細估惟各處應辦要工甚多庫款極絀只可撙節經營除下游河身通暢無庸挑挖上游舊制無隄之處或有隄只須堵築缺口量為加修外應自五空閘起至大興采育止開段挑挖

河身並裁灣取直共三千四百九丈口寬十二丈五尺至四丈不
等底寬十一丈一尺至二丈八尺不等深六尺五寸至二尺不等
並築攔水壩十四丈又自采育起至武清縣上村止應挑河身九
千二百九十丈口寬五丈五尺底寬四丈三尺至三丈九尺不等
深四尺五寸至三尺不等卽以挑出廢土培隄又築采育北門外
隄工長六十丈頂寬二丈底寬六丈高八尺又自武清柳行村起
至天津韓家壩止應築東隄八千二十六丈頂寬一二丈不等底
寬六丈五尺至四丈五尺不等高七八九尺不等又應培築縱上
村缺口二道工長二十七丈後縱上村缺口一道工長六十六丈並
加後俄四十七丈桐林村缺口一道工長五十三丈村東減溝缺
口一道工長三十丈陳莊缺口一道工長三十六丈並加後俄三
十丈徐莊缺口二道工長一百一十三丈牛鎮減溝缺口一道工長

十二丈以上缺口築頂寬二丈不等底寬七丈至四丈不等
高一丈二尺至六尺不等險要處酌加椿料並鑲埽段統計挑築
土二十九萬六千餘方客工向不在內當於議定後責成樞桂孫
督同印委各員招集附近災民分投興作以工代撫於四月二十
九日剋期告竣卽飭試用知府柯欣榮前往驗收一律過估如式
其用工費銀二萬四千一百八十二兩七錢二分三釐由府尹臣
於順屬賑撫項下撥給銀一萬兩並飭局於直屬賑撫項下撥給
銀一萬四千一百八十二兩七錢二分三釐俟彙歸賑案另行奏
報除飭各該地方官查照同璋隨時督率民夫妥籌修守毋任廢
弛外理合會同兼管順天府府尹臣畢道遠順天府府尹臣周家
相恭摺具
奏伏乞

皇太后
皇上聖鑒
謹奏

出洋巡閱情形片

光緒十年閏五月初七日

再臣出洋巡閱日期業經奏報在案臣先已檄調天津鎮總兵丁汝昌所統超勇揚威兩快船威遠康濟兩練船齊集大沽口外鎮東鎮西鎮北鎮南鎮中鎮邊等礮船齊集煙臺五月二十九日會同張之洞吳大澂張佩綸督率各船放洋操演雁行魚貫各陣式帆纜燈旗各號令及礮施放之法尙能整齊靈變閏五月初一日駛抵金州之旅順口察勘新築礮臺營壘全仿洋式堅緻曲折頗據形勝道員袁保齡督挖船澳船池修建軍械庫屋工程已及大半操演水雷旱雷均漸熟習該處扼東奉渤海之要衝與登州及大沽口遙遙相對現有提督朱慶等陸軍與丁汝昌水師互相犄角布置已稍就緒設遇海上有事冀可憑險固守牽制敵船使不遽深入初二日過煙臺會操各船聲勢略壯法國水師提督利

士比統鐵甲兩艘快船兩隻駐煙請臣等閱操其船堅礮巨實
較北洋船式爲雄大而操法尙不甚相遠也初三日抵威海衛閱
看所延德國副將哈孫教演魚雷員弁兵匠齊力操作射放有準
駕駛雷艇快捷如風洵爲制敵利器道員劉台芳會同哈孫督操
布置諸務甚有條理惟該處瀕海南北兩口地闊水深若築臺設
守需費極巨一時不易措辦耳初四日張之洞張佩綸同舟赴滬
臣與吳大澂揚舫北旋於初五日抵津料理積牘吳大澂卽移駐
新城所有巡閱情形理合會同通政使司通政使臣吳大澂附片
具陳伏乞

聖鑒謹

奏

代奏朝王謝

光緒十年閏五月初七日

奏爲據咨代

奏仰祈

聖鑒事竊夫長慶一軍撤回三營移紮金州仍留三營暫駐朝鮮王城以資鎮撫節經陳奏在案茲朝鮮國王遣派陪臣李用俊齎到咨文內稱該國前年變亂仰仗

皇威綏靖始能轉危爲安保有今日一國恃以無恐現因中原防務緊要吳提督六營撤半西歸不勝惶悚依向有三營仍留善後感幸之極咨請轉奏代達謝忱等因前來臣查朝鮮前此變出非常外侮內憂一時交集仰蒙

聖謨廣運

命將出師用能扶危定傾保有宗社該國王懲感前艱痛定思痛

其感戴

朝廷字小之

德固宜沒齒不忘吳長慶治軍素有紀律自駐師海外軍士艱苦
愈甚約束愈嚴於民間無秋毫之犯該國王親軍各營皆請代爲
訓練客主尤爲輯睦一旦分軍內渡自有依依不舍之意朝鮮海
禁初開其守舊謙倭之徒交相煽惑君臣上下驚疑未定今留營
善後賴有袁世凱吳兆有等彈壓照料得臻安謐所陳均係實情
除俟奉到

批旨再行恭錄咨覆外所有該國王感激鳴謝緣由理合據情代

奏伏乞

聖太后

皇上聖鑒謹

謹將朝鮮國王原咨照鈔恭呈

御覽

朝鮮國王爲咨會事。敝邦自經前年變亂。國步艱難。民心渙散。其能轉危爲安。保有今日。莫非我

皇帝陛下眷顧綏靖之

恩。暨貴大臣體恤援護之惠。亦惟廣東提學吳軍門宣風

皇威。恤難扶危。三載之間。民國賴安。折奸萌於未然。杜外侮於方來。威愛互濟。功莫與京。至若營務處袁世凱。分統朱先民。黃仕林。吳兆有。總兵方正祥。張光前。咸克奮威效力。協幹防事。一國上下。恃以無恐。現因中原防務緊要。檄吳軍門移兵一半駐防金州。竊以軍門西歸。今已閱序。方期卽節之遄旋。以資保後。驟聞營壘之撤半。實深危懼。然而尙有三營仍留。善後會辦防務。袁中書世凱

公廉明達軍民孚悅吳統領張總兵與之悉心其濟庶可漸次安
謐感幸之極不知攸云移回三營已於本年四月二十九日起程
內渡西望旌旛不勝悵依儿係大小事情理合據實具咨伏乞轉
奏

天陞代達小邦感激鳴謝之忱不勝幸甚專差機器局幫辦李川
俊齋咨前去爲此合行移咨請照驗轉奏施行須至咨者石咨
欽差北洋通商大臣衙門

京城平糶摺

光緒十年閏五月初十日

奏為遵籌銀款采購米糧運京平糶恭摺仰祈

聖鑒事竊臣接准部咨欽奉光緒十年五月十五日

上諭現在雨澤稀少糧價日貴軫念民生亟宜豫籌接濟茲據通

政使司參議延茂奏請飭提款采購米糧運京平糶一摺著李鴻

章會同順天府妥議具奏另片奏請飭用機器碾磨雜糧等語著

該督等酌量辦理欽此並准府尹臣咨會前來當即督飭司道

悉心籌議伏查現在雨澤愆期糧價漸長小民糶食維艱自應展

辦平糶惟延茂原奏提借銀二十萬兩為數過鉅直隸係缺額省

分上年又大水為災藩運各庫業因辦理賑濟無論正雜各款糶

掘一空勸集各省捐輸亦因今春工撫動撥殆盡支應局經收北

洋防費絲毫皆歸正用並無閒款近來各省辦防報解日少海防

喫緊用款日繁竭蹶分更無存銀可以挹注惟

京師爲根本重地平糶乃荒政要圖雖現奉

恩旨賞撥京倉米五萬石辦糶借賑仍應設法籌款添購以裕民食查文應局原存練餉制錢一款歷經奏撥順天直隸山西賑需均欽奉

諭旨允准有案京糶尤關緊要應卽援照辦理上年派員赴浙追提浙興承領練餉成本制錢二十萬五千串除應歸還上年借墊順屬賑需不敷銀二萬三千一百五十餘兩計尙可合銀十萬兩有奇前准戶部咨令解部現在尙未追齊擬請

旨卽由此款內提撥銀十萬兩先飭司道竭力挪墊遴派廉幹員董以五萬兩分赴鎮江上海購辦大米交招商局輪船分批運津刻下商販由營口海船運至天津應糶雜糧不少價值尙屬相宜

再以五萬兩就近購買玉米高粱麥豆等項向來運糧輪船海船
係在天津交卸若順天委員在通州接收則米糧到通又須盤量
交代應令順天委員先至天津會同津員驗兌押運省一轉折即
少一仙耗到通後即由順天委員接運至京發局平糶其天津委
員薪水盤費及米糧由津運通水腳等項由直隸籌款給發順天
委員薪水盤費及米糧自通至京腳價等項由順天籌給均准作
正開銷若此後甘霖渥霈糧價平減無須再糶隨時察看截止購
運糶局所收此項價值有無虧折應由順天府核明報銷餘銀就
近解赴戶部交納仍與戶部飭令解部原案相符其米糧進出海
口及經過地方應概免釐稅即行出示曉諭以示體恤而廣招徠
至延茂擬以天津磨麵機器運京碾磨雜糧一節查天津磨麵機
器係商人集貲購買僅止一具磨麵出售前因修換鍋鑪停磨數

月今仍照常碾用並非官本所置亦未同於廢器每日可磨麥二
十三四石所出之麪較尋常磨麪質細色白惟應用煤油暨管理
機器燒火工匠費用頗巨工本重於民磨麪價亦貴於市麪用以
平糶未能合算且安置機器及大烟肉均係用磚就地實砌一經
拆動損壞必多運京亦多不便自應仍用民磨碾麪發糶為宜所
有籌議緣由理合會同兼管順天府府尹臣畢道遠順天府府尹
臣周家相合詞恭摺由驛覆

奏伏乞

皇太后

皇上聖鑒訓示遵行謹

奏

力籌戰備摺

光緒十年閏五月十三日

奏為遵

旨力籌戰備詳陳防務情形仰祈

聖鑒事竊准軍機大臣密寄閏五月初九日奉

上諭天津至山海關一帶沿海地段縣長備豫當已嚴密礮臺其

若干處著查明詳確情形並將防軍分紮地方某處兵勇若干何

人統領山海關防兵是否足敷扼守一併迅速詳晰具奏法人將

以兵艦北來意圖要挾北洋防務關繫極重李鴻章身膺重任務

當力籌戰備與吳大澂會商辦理總期毫無罅隙用紓朝廷廑念

之殷等因欽此仰見

聖明思慮豫防綢繆肅戶

指示詳切感悚莫名伏查天津至山海關一帶沿海地段縣長港

以紛歧斷無處處設防之理惟當於敵舟可以深入登岸處所扼
 要守險以杜竄越守口之營兵數不必甚多但以堅守礮臺為主
 並分布水雷旱雷制其衝突其後路接應之師須有大隊以備游
 擊庶臨事聲援稍壯而前敵軍心益固臣歷年布置防務率本此
 意以為設施直境敵舟可以深入者曰大沽口北塘口為最要大
 沽口南岸大礮臺四座周圍小礮臺四十座記名提督大沽協副
 將羅榮光統協標練兵一千八百人守之親軍礮隊一營為接應
 北岸大礮臺二座平礮臺六座記名總兵劉祺統直字兩營守之
 副將史濟源帶保定練軍一營為接應另有水雷營專管布設水
 雷電綫等事並令提督丁汝昌調派鎮中鎮東鎮西鎮北四礮船
 收入海口與礮臺相依護又令前敵營務處記名提督吳殿元駐
 沽聯絡將領妥籌戰守月前商飭提督周盛傳督所部桃築長將

重濠十八里由該營直達大沽以便有警星速馳援北塘口南岸礮臺二座不臺七座北岸礮臺一座不臺三座署廣西提督唐仁廉統仁字義勝各一營通永練軍三營分駐扼守另募專管水雷哨隊並調鎮南鎮邊兩礮船收入海口與礮臺相依護直隸提督李長樂統武毅馬步四營提標練軍馬步二營駐蘆臺爲後應由北塘東北至灤州樂亭昌黎一帶曰清河口曰老米清曰甜水溝曰清河口皆有淤沙數十里攔港潮長不過數尺潮涸僅通民舟輪船斷不得近吳大澂分撥所部親軍礮隊一營步隊一營駐樂亭之黑坨副將劉超佩統鞏字三營駐樂亭甘草坨一帶往來巡哨以防敵乘小舟登岸昌黎之東曰洋口水勢較深輪舟可泊十餘里外吳大澂派候補直隸州戴宗騫統綏字馬步四營分駐扼守又東則山海關最爲險要臣先已派正定鎮總兵葉志超統

正定練軍馬步四營在南海城老龍頭堅築礮臺惟該處老水貼岸兵輪可泊近處慮難受巨礮擊兵力尤單前派前甘肅提督曹克忠馳往察勘必須添隊合紮該提督願告奮勇統帶津勝六營前往分屯關內外威遠城崔家臺大灣馬家店青石溝等處與葉志超互相犄角應援該提鎮老於戎事訓練調度均甚周詳緩急尙有可恃至大沽後路所築新城則有大名鎮總兵徐道奎統大名練軍二營礮隊兩哨與葛沽營守備張曙德練兵一營駐守北塘後路之軍糧城則有記名總兵除邦道馬隊二營扼守天津則有記名總兵黃金志統護衛一營練軍四營三哨都司王得勝帶親兵礮隊一營由臣居中控制而其專備各路援剿者則有湖南提督周盛傳統盛軍鎗隊十一營馬隊五營分駐小站馬廠一帶記名提督劉盛休統銘軍鎗隊十營馬隊一營駐紮興濟鎮總

視海口何處緊急卽調赴馳援專爲游擊之師此沿海各處分紮
地方及兵勇營數布置防務之詳細情形也各軍所用鎗礮多係
後膛新式平日督飭將弁認真操練打靶布陣原備有事時戰守
之用此次法人以兵艦倉猝非來意圖要挾度不過遊奕海上虛
張聲勢其大船喫水深者不能進大沽北塘各口若欲登岸深入
內地決非兩三萬步隊不能得手該國遠在數萬里外調兵須上
下集議必數月乃能來華現在越南境內法兵及土兵聞只一萬
數千人勢不能全數移調卽使聯踪而至水陸並進臣等兵力雖
非甚厚但冀餉需無缺當可設法應戰爲

京畿捍衛要衝臣惟隨時察酌機宜嚴申紀律明定賞罰俾將士
咸知奮勉其伸同仇敵愾之忱以稍紓

宸廑於萬一所有力籌戰備各情形謹會同會辦北洋事宜通政

使司通政使臣吳大澂繕摺山驛五百里隨陳伏乞

皇太后

皇上聖鑒訓示謹

奏

覆陳校路布置片

光緒十年閏五月十三日

再奉閏五月初十日

密諭山海關一帶後路空虛著於所部防軍內抽調二三營合之
左宗棠所調兩營均交唐仁廉統帶前往扼守北塘防務應派何
員接辦是否可以移紮並著妥籌具奏等因欽此伏查山海關左
右現有曹克忠六營葉志超四營合力布守計可堵扼要衝其後
路昌黎樂亭一帶又有吳大澂所部馬步十營聯絡分紮聲勢頗
壯似覺未甚空虛設將來敵船攻撲甯海城礮臺意圖深入臣擬
派劉盛休銘軍馬步馳往援應攔剿以顧京東門戶目下所部各
營均紮要地實無可抽調之軍且兵分則力單合則勢厚零星雜
湊轉恐難於用命北塘防務關係緊要唐仁廉經營年久仍應責
成布置以收實效至左宗棠所調兩營尙未北來儻法國兵船猝

至恐未便由海道裝運應請俟該營到後仍遵前

旨暫行駐紮通州爲後路稍助聲援亦得控制之宜是否有當伏

祈

聖鑒謹附片具

奏

覆奏各口礮臺工程片

光緒十年閏五月十三日

再奉閏五月初九日

上諭旅順口礮臺是否堅實天津至山海關一帶礮臺其若干處
卽著查明詳確情形將直隸口岸及旅順煙臺各礮臺繪圖貼說
呈進等因欽此除旅順口礮臺已於出洋巡閱情形片內附陳大
略直隸各口礮臺若干處於另摺奏陳外查大沽北塘山海關各
礮臺皆逐年用三合土堆造而成工料尙屬堅厚大沽北塘仍就
咸豐年間防營舊基充擴而增益之兩岸沙灘一望無際掘地三
尺卽見水無高阜可倚亦不能添挖地溝其地勢然也所幸海口
淤狹大船巨礮不能駛入軍士定能憑險扼守旅順口黃金山老
虎尾礮臺最得地勢係延德弁漢納根仿照德國新式創建尤爲
曲折精堅各礮臺隨時增修舊存草圖未盡諦當自應另行詳繪

查正任津海關道周馥隨營多年熟諳工程究心戰略前因病給假調理現甫就痊擬飭委前赴各海口會同該將領詳細查勘礮臺繪圖貼說呈以便恭進並令該道周馥各口岸聯絡各營將會督地方文武編查民船嚴禁接濟勾結等弊以裨防務合先附片覆陳伏乞
聖鑒謹
奏

茲陳使命約文情形片

光緒十年閏五月十三日

再奉五月初十日

密諭前因福祿諾臨行巡邊之言李鴻章並未奏聞亦未告知總理衙門業經降旨申飭現在法使卽以此爲口實並以簡明條約法文與漢文不符藉詞嘗試無理取鬧皆由李鴻章辦理含混所致著責成竭力籌備爲自贖之地等因欽此伏讀之下悚悚萬分查福祿諾臨行時忽以限期退兵之語相要挾臣當卽正言駁斥仍飛函密告雲貴督臣岑毓英廣西撫臣潘鼎新相度機宜酌量進止隨時奏明請

旨辦理緣臣係議約之人與關外相距過遠軍情地勢究以調紫何處爲宜非敢遙度其時適因所議簡約雖蒙

聖明曲諒而都人士嘖有煩言若聞福西又請限期退兵必更譁

譟徒惑眾聽臣又明知事難照行而約款未可遽背欲令岑毓英
潘鼎新查照調回邊界約文自行斟酌妥辦實具委曲求全之苦
衷固未敢據以上

聞致干

聖怒亦未立即告知總理衙門疏忽之咎誠所難辭迨潘鼎新以
電報請示臣即飛告總署屬其請

旨定奪昨又將當日面駁情節詳細面達總署法使即藉爲口實
而臣並無允即調回之詞可以互證其質實無絲毫含混至謂條
約法文與漢文不符似係旁觀挑釁之論臣本不識洋文稅務司
德璫琳道員馬建忠素精法文皆欲成就此事臣原令該員與法
領事法蘭亭等再三校對據稱並無舛譌自來各國訂約必聲明
以洋文爲正非獨此次法約爲然而嗣後彼此辨論又往往以漢

文不符兩相齟齬此總理衙門與臣等所歷辦而深知者誠如
聖訓無理取鬧不過臨時多一辨駁究其大旨亦無甚出入也惟
是此次越境觀音橋接戰獲勝之後法人藉詞要索所慾甚奢殊
難甘心就範臣斷不敢狃於和議辦防疏懈而環顧大局恐竟無
收束之法殷憂彌切負疚更深謹附片據實瀝陳伏乞
聖鑒謹

奏

練軍剿匪獲勝摺

光緒十年閏五月二十五日

奏為遵派古北口練軍出口剿匪及宣化練軍連次獲勝情形恭摺仰祈

聖鑒事竊臣欽奉閏五月初九日

寄諭繼格奏匪首楊步瀾等在熱河建昌縣滋擾現竄至圍場邊境盤踞著李鴻章李長樂刻即調撥古北口練軍迅速前往會同剿辦等因欽此臣即飛咨李長樂趕緊調撥於十一日奏報剿辦多倫附近匪徒宋敬思等摺內陳明在案旋據李長樂覆稱先接熱河都統繼格咨會已派提標中軍參將許春浦選帶古北口練軍步隊五百名又由蘆臺抽調馬隊一哨剋日馳往會剿並探得多倫附近匪徒即有前在建昌之匪首楊步瀾等在內似楊步瀾等已與宋敬思等合股又據宣化鎮總兵王可陞稟稱派赴多倫

剿匪之練軍馬隊營官郭萬隆等探聞匪徒已聚至一千五六百人內有王姓爲首撲犯經棚卽於閏五月初五日出隊迎剿該匪佔住經棚附近三義泉畢流溝一帶恃眾鴟張抵死相拒遂併力衝殺自辰至申其斃匪五百餘名奪獲旗幟鎗刀馬匹多件我兵亦受傷十餘人初十日追至白岔坤兒川霄龍背又與接仗斃匪數十名餘眾分路逃竄現仍追剿等情前來臣已欽遵

諭旨卽飭王可陞於二十一日出邊親往督辦並令派去各軍查明匪首楊步雲與宋敬思等是否合股務卽分路追剿將首要悉數擒治匪黨剋日殄除其有被竊飢民仍設法解散安爲撫戢暨分飭各屬合力捕辦以靖地方外所有遵派古北口練軍出口及宣化練軍在邊外剿匪連次獲勝緣由理合會同提臣李長樂恭摺覆陳伏乞

皇太后

皇上聖鑒

奏

淮軍修造師船片

光緒十年閏五月二十五日

再准軍水師營哨各船每屆釘造大修以及隨時修整向由江南船廠勘驗興工由廠自行報銷前因春字水師十船已屆釘換之期經前兩江督臣左宗棠以非江蘇留防水師應改由淮軍糧臺核辦當行據江南船廠委員錄送造銷成案並聲明造辦船隻工料曾由前兩江督臣沈葆楨奏准以光緒二年報銷作為定章等情前來查核新釘船隻運送布及完關稅計長龍每號工料其銀六百四十七兩二錢六分二釐舢板每號工料銀二百二十七兩四錢八分又修整舢板每號工料銀一百數十兩八圓領江各船修費每號四百餘兩現在淮軍水師駐防直隸天津並分駐山東濟甯江蘇清江瓜洲揚州一帶往來操巡護運其長龍四號舢板八十三號其修造各工藉專設船廠又多糜費經臣飭令各該營

哨自行核實妥辦工竣報明派員驗收所有釘造新船應用工料
只准按照船廠成案銀數支發造報不得逾於向來釘造銀數至
大修一項亦應予以定數除本色帳蓬油艙經費按年造報准銷
有案仍循舊照發外每屆大修長龍每號酌給銀一百兩舢板每
號酌給銀八十兩較江南船廠修費成案有減無增其釘造修整
各年限凡分駐山東江蘇等處操巡護運各船以屆期九年釘造
新船一次三年大修一次惟駐天津朝鮮各海口師船因北地與
南省不同一交冬令烈風堅凍且海水味鹹船身板片最易損傷
艙縫朽壞應改爲六年一造兩年一大修俾期堅固而利防剿現
改歸淮軍案內初次造報應照新章

奏咨立案據報銷局司道具詳前來臣覆核無異除將光緒九年
分淮軍餉內動給釘造各船工料用款及發過修費銀兩先行列

入季冊報部隨後彙案請銷外理合附片陳明伏乞
聖鑒敕部查照謹

奏

吳長慶請卹摺

光緒十年六月初二日

奏爲統兵大員積勞在營病故謹臚陳事蹟請

旨優卹恭摺仰祈

聖鑒事竊廣東水師提督吳長慶前於奉天金州防次患病經臣

疊次奏蒙

賞假在營調理茲接該提督咨稱日來病勢增劇自分此身萬無

生理伏念長慶束髮從戎受

恩至渥圖報未能一死誠不足惜第當此時局多艱遽填溝壑雖

在重泉齋志無已所有恭謝

天恩遺摺片各一件咨請代爲奏遞並據慶軍營官黃仕林等稟
報吳長慶於閏五月二十一日辰刻出缺等情臣查吳長慶籍隸
安徽廬江縣其父吳廷香由優貢就選教職在籍辦團以義聲倡

率鄉里粵匪陷廬江廷胥死之吳長慶痛父殉難誓與髮逆不共
戴天糾合鄉團屢助官軍攻勦同治元年臣督師赴滬稔知吳長
慶忠勇邁倫令募帶慶字三營相從東下協同各軍克復柘林南
匯金山奉賢等城旋移師入浙進攻嘉善嘉興乍浦平望湖州長
興等處皆克之其尤嘖嘖人口者嘉興之役吳長慶帶隊徑薄城
下賊以鎗礮連環轟擊彈如雨集肘骨皆穿猶復裹創血戰奮不
顧身用能立拔堅城以疏通山蘇達浙之路迨臣督師勦捻吳長
慶復統步隊八營馬隊三營隨同北渡轉戰於山東江蘇直隸河
南境內無敵不摧東西捻股蕩平累保記名提督並蒙

賞給瑚敦巴圖魯勇號

賞穿黃馬褂嗣以江淮一帶戎備空虛復調該軍南駐徐州旋移
紮江南於下關浦口烏龍山江陰等處創築礮臺挑濬河道水利

江防百廢具舉歷任兩江督臣馬新貽李宗羲沈葆楨劉坤一皆倚之如長城光緒六年海防戒嚴吳長慶奉辦山東軍務之命復自江南親率六營移駐登州數年之間疊承恩命由直隸正定鎮總兵洊擢浙江提督調補廣東水師提督八年六月朝鮮內亂燬及日本使館日人以兵船駛入仁川維時該國內外交訌群情洶洶宗社安危之機間不容髮吳長慶拔隊渡遼疾馳赴援數日間獲致亂首人心始定旋奉

俞旨褒嘉

賞三等輕車都尉該提督感激

恩施留駐鎮撫約束嚴明朝鮮銀賤錢荒百物昂貴將弁士卒艱苦萬狀毫無怨言蓋不私貨財故緩急能以相諒不避艱險故患難樂於相從其所以致此於部曲者良非偶然而該提督勞身焦

思亦遂寢成鋼疾矣平日訓練餘閒惟以經史自娛澹泊寡營雅歌不輟擬之儒將庶幾無愧今春奏令撤帶三營內渡籌辦金州海防朝鮮社民咸頌遺愛不置方今時事多艱將材難得如吳長慶者可爲干城腹心之選報國丹忱齋恨入地悼痛曷任當此鼓譟思將之時定有帷蓋推恩之舉合無仰懇

天恩敕部照提督軍營病故例從優議卹並將戰功事蹟宣付史館立傳以彰忠藎至於建祠

予諡諸曠典出自逾格

仁慈非臣下所敢擅請而該提督勲績卓越實非尋常將領可比今以死勤事未便渾沒不以

上聞除將遺摺各件據咨轉奏外所有吳長慶在營積勞病故籲

請優卹緣由理應恭摺具陳伏乞

皇太后

皇上聖鑒訓示再吳長慶長子附生吳保德次子文童吳保初均
年已及歲合併聲明謹
奏

吳保初剝肉療親片

光緒十年六月初二日

再據慶軍營官記名提督黃仕林等呈稱吳長慶次子文童吳保初年甫十六間父病晝夜自廬江本籍馳至金州省視听夕侍奉寢食俱廢閏月初見長慶病篤隣藥罔效夜分人靜潛禱於神割心膾肉兩片和藥以進旁人窺其神色慘沮衣有血痕再四堅詢始以實告迨長慶病歿保初號泣失聲悲感行路該提督等目擊情形同聲矜歎不忍聽其湮沒呈請奏懇

旌表前來臣查該文童吳保初天性肫篤開闢跋涉剝肉療親出自童年尤堪嘉憫相應

奏懇

恩施

准其旌表以彰孝行伏乞

聖鑒

敕部施行謹附片具

奏

遵賞各營丹藥摺

光緒十年六月十五日

奏為欽遵

諭旨分賞各營丹藥恭摺叩謝

天恩仰祈

聖鑒事竊臣承在軍機大臣字寄光緒十年閏五月二十八日奉
上諭欽奉

慈禧端佑康頤昭豫莊誠皇太后懿旨現交災署各省防軍荷戈
從役廩念殊殷前經分賞江南等省各營御製平安丹著再賞給
直隸各營二十匣及奉天海口防營十五匣交李鴻章傳旨分賞
其奉天各營卽由李鴻章轉發欽此該署督務當仰體
慈恩加意拊循俾各知感奮以壯戎行等因欽此仰見
聖慈軫念戎行無微不至欽感莫名當卽恭設香案率同各營將

士望

闕叩頭謝

恩重恭錄

諭旨傳知直隸各統領營哨官謹將

御賜平安丹二十匣分給祇領其轉發奉天海口防營十五匣並
交輪船由海道敬謹齎送一律領訖臣維古聖王命將出師類多
敘其勞苦作為詩歌以相慰勉其視將校部曲常有家人骨肉之
恩疾痛寒暑無一不榮於念慮故士皆感激思奮慷慨赴敵以效
命疆場克奏膚功也方今法虜披猖海疆告警直隸及奉天防營
分紮北洋各口海濱地勢卑溼加以溽暑薰蒸該將士等昕夕操
防馳驅於驕陽烈日之中巡徼於苦雨炎風之際疢癘繁興呻吟
聞作仰蒙

皇太后

皇上痾瘵在抱

頒賞金丹欽遵分給調治沈疴立起功效異常該將士等大馬餘生仰賴

九重再造之

恩得以保全性命莫不枕戈待旦感奮前驅捨身圖報臣惟有恪遵

聖訓加意拊循務期眾志成城同仇敵愾以仰答

高厚生成於萬一所有欽遵

懿旨分賞丹藥感激下忱謹繕摺叩謝

天恩伏乞

皇太后

皇上聖鑒謹奏

陵樹撥銀展限摺

光緒十年六月十五日

奏爲遵查

西陵二限樹株尙須澆灌擬每歲由直撥銀二千兩再行展限三年恭摺仰祈

聖鑒事竊准戶部咨開議覆守護大臣載卓等奏

蘇陵

蘇東陵二限樹株澆灌經費仍難停減請撥款應用一摺應由臣派員前往查勘此項樹九千五百餘株是否全數葱茂其澆灌經費每年實需若干能否於前定三千兩之數再從節省抑或竟於澆灌初限經費內通融勻濟無須另籌款項覆奏辦理等因奉旨依議欽此當派候補道高驂麟前往詳確查勘茲據該道稟稱往見守護大臣並晤樹工處司員先行詳詢據稱

慕陵

慕東陵風水樹株原議本分四限添種因各山多係砂石當時栽種初二限樹株係刨去石塊換填黃土地中潤氣不能上達若遇天時乾旱澆灌失時卽成黃萎且各山距水旣遠山徑崎嶇費工多而得水少與他處土脈情形不同承辦頗形竭蹶是以前將三四兩限樹株奏請緩辦該道當與司員恭詣各山詳細履勘並察核案卷所言尙係實情所有二限樹九千五百餘株現時全數蔥茂惟正資澆灌長養經費勢難裁停據該司員聲稱初限添種樹八千一百餘株與二限相差不過一年亦須勤加澆灌若遽將初限經費勻濟二限應用兩處必皆不敷恐將來均行黃萎蔭護攸關未敢率擬該道復與切實籌商設法撙節擬俟冬令澆灌時將初二兩限歸併酌量減水每年可省銀一千兩而於樹株無礙請

以每年二千兩再展限三年等情臣查二限樹株係同治十年添種光緒三年以前澆灌銀兩由部給發嗣經部臣奏明自光緒四年起每年由直隸藩庫撥銀三千兩以三年爲限迨限滿後復經守護大臣奏請展限三年扣至光緒九年展限屆滿今又奏請再展三年每年仍須銀三千兩此項澆灌經費本應廣恩庫給發與直庫無涉直隸向係缺額又值災歉頻仍用款繁巨誠如部議實有自顧不遑之勢且已籌撥六年之久亦屬後繼爲難惟事關陵寢風水旣稱地多砂石尙須澆灌經費未可裁停亦何敢稍分畛域應請如該道及樹工處司員所議減去銀一千兩每年撥銀二千兩再行展限三年飭由藩司陸續設法通融撥濟俟此次展限滿後照案停止另由守護大臣自行籌款辦理所有勘議緣由理合恭摺覆

奏伏乞
皇太后
皇上聖鑒訓示謹
奏

易州旗丁試辦蠶桑片

光緒十年六月十五日

再據候補道高驂麟稟稱此次奉差前往易州晤該州知州鄒振岳訓知署中種桑養蠶並下其法於民間漸興美利嗣與西陵各司官討論公事該司員等備言旗丁貧苦額支錢糧僅敷當差不足贍養家口閒散人丁毫無生計卽陵部司員向例不派外差別無陞遷之路生齒日繁亦多坐困該道恭查

西陵各山除內外圍界內不准種植雜樹此外口門以內空曠宜樹之地不少本無禁種之例因與語及蠶事據稱旗丁婦女從前曾有育蠶之家以浴種繅絲俱未得法旋作旋輟今聞州署蠶桑著有成效人情頗爲踴躍曾擬自集資本購買桑秧試辦惟係官地恐致互相爭競或服勞而無所獲或攘利而無所懲是以中止

該道以該司官等既有自行集貲試辦之意若因勢利導妥定章程但須明示勸懲並不動用公款從此逐漸推廣利源日興於旗丁生計不無小補正與

列祖

列宗貴農重本圖耕圖織之訓相符現值該州蠶絲有效轉相師法事益易成等情具稟請奏前來臣查該道與該司員等所擬自集貲本試辦蠶桑爲旗丁推廣生計不爲無見擬請

敕下守護大臣察酌於內外圍界外可種之地督飭量力舉行謹附片具

奏

整頓蘆鹽摺

光緒十年六月十五日

奏爲遵議蘆鹽事宜分別整頓辦理恭摺具

奏仰祈

聖鑒事竊准戶部咨開奏請整頓各省鹽務一摺又鹽務公費飭照銷鹽成數給發一片光緒九年十月二十七日奉

旨依議欽此鈔單咨行到直遵卽督飭長蘆運司額勒精額詳稽案牘熟察情形通盤妥細籌議茲據該司詳稱戶部原奏裁浮費以清本源一節查陋規浮費爲累商虧課之漸蘆經曾國藩及臣隨時批行禁革上年又將該司應得之款除廉俸辦公兩項外一切雜費全行裁除其商交各項解費及領告項下支發各款冗費亦卽酌量減裁將裁去銀兩統歸節存每年提解京員津貼銀三千兩餘銀分給各商撥抵正課並通飭所屬鹽官及行銷蘆鹽各

州縣營查明如有商人交款除向章必不可少者照舊外其餘一律裁革嚴禁胥吏人等藉端勒索違則分別參辦又原奏包重者改歸舊制俾免佔礙銷路卽設法減輕成本以保正課而復原額一節查長蘆額引從前九十六萬六千四十六道每引築鹽僅止三百餘斤商交課款不過一兩一二錢今雖減騰引六十六萬二千四百九十七道而每引重至五百數十斤合計浮於九十六萬餘道每引三百斤之數課款至二兩數錢亦倍於一兩一二錢之數鹽包既重實足佔礙銷路但欲減斤必須減課方爲持平辦法查釐商交款凡可停緩者業經曾國藩及臣節次奏蒙
恩准所有現交之款均關解支要需值此時事艱難內外交窘欲再減商交課款則餉項必致愈絀欲專減引鹽斤重則商累益覺難支輾轉需思均多窒礙況值旱澇靡常運銷遲滯物產艱貴銀

價增昂皆不免虧折耗時勢使然非人力所能強制惟有就現
行引鹽應徵課款隨時設法嚴催則於公家有益而於商本無損
又原奏捆運各商在懸岸行銷無定地亦無定額其未捆運之處
引岸任其終懸課額永難規復應剋期招商改爲認運一節查長
蘆懸岸道光二十八年清查時計有四十四處數十年來未能一
律招商認辦光緒九年前運司如山任內尙有直省之開州元城
永清衡水邢臺隆平唐山鉅鹿南和任縣柏鄉深澤平鄉曲周雞
澤肥鄉廣平成安東明長垣豫省之扶溝延津祥符鄆陵杞縣洧
川太康郟城等二十八處均有官商認捆詳定銷鹽成數並未任
其終懸惟因私充銷滯未能按年悉照定數領運該司認真釐剔
如開州元城扶溝三處稍可整理已令商人德興裕詒德全德照
額認辦取結咨部其永清等二十五處屢經勒催多方開導據該

官商憑陳艱苦情形均未能勉遵辦理又經出示招認迄今年餘無過問者推求其故實因疊遭兵燹災荒人民流徙或額引本多口食有限或硝鹽偏地官引受充以致銷數大減驟難整頓既無他商接認若勒令現捆官商包額勢必紛紛告退轉致虛懸無著課款有虧該司已將捆運成數酌量加增飭令按年領運惟恐嗣後藉端諉卸領運不能及數且鹽包抵岸多發民販並不設店分銷亦慮引岸廢弛益難收拾不若改捆爲認以專責成查永清等二十五處其懸引九萬七千四百二十七道內商人義源捆運永清縣引一千二百道紹德恆捆運衡水縣引六百道義泰公捆運邢臺縣引五千道隆平縣引六百道唐山縣引二百道鉅鹿縣引二百道南和縣引九百道任縣引一千二百道柏鄉縣引七百道日昌捆運深澤縣引六百道信昌捆運平鄉縣引二百二十道曲

周縣引一千道雞澤縣引二百八十道懷德縣引一千
二百道廣平縣引一千一百道楊成源縣引一千六百
道德興裕縣引一千道長垣縣引二千二百道和豐縣
運延津縣引四百五十道福聚縣引六千道鄆陵縣引
二千道振德縣引一萬道候補運同嚴信厚縣引一千
六百道洺川縣引六百道太康縣引八百道均係近一二年間
設法勸令竭力加增始及此數統計抽運引四萬二千五百道尚
懸引五萬七千一百七十七道雖抽數自一二成至六七成不等
未能一律然合計已在原額四成以上擬照現定抽運成數飭各
商改爲認運取具保結咨部立案不准少抽仍督令實力經理設
店分銷以期逐漸加增規復原額又原奏停外引十萬道光緒九
年限滿停京引二萬道光緒十年限滿及此妥議良法屆時毋再

請展一節查長蘆額引爲數本多雖疊奉提繳減停但鹽包節次
增重計現行六十餘萬引之鹽實浮於原額九十餘萬引斤重之
數民間食用有常餘鹽無處銷納況直豫地多鹵鹵百姓慣食硝
鹽又兵燹災荒之餘戶口凋殘銷數益滯庫存歷年積引多至九
十餘萬道未能疏通實無良法增益新引且規復停引原爲免虧
課銀惟從前課額每引僅完銀四錢數分至五錢零道光元年二
十一年兩次減引十八萬三千五百四十九道並未減課仍按原
額九十六萬六千四十六道攤徵每引完銀至六錢數分至道光
二十三年減引十萬道同治九年減京引二萬道始行減課是現
引雖止六十六萬二千四百九十七道其實仍完八十四萬六千
四十六引之課則徵收已不爲少矣所有原停外引十萬道上年
已奏准部覆展限三年無庸置議其停京引二萬道勢須一併推

展屆時再行詳奏又原奏鹽務公批飭照銷鹽成數給發一節查
長蘆鹽務局面本不如他省之寬博所有督銷各州縣營向無給
發公費應無庸議再查光緒八年鹽引奏銷案內將無鹽督銷各
州縣營照章聲請免其考核部議仍令照未完分數補行題參惟
長蘆引岸本少暢銷之區嘉慶以前每引僅築鹽三百餘斤課款
無多運費較省地方完善口食增繁每年應銷引鹽尙不能領運
如額道光以後鹽包節次增重課款倍增運費繁巨地方又疊被
災荒人民流徙銷數日滯直豫產硝之地多屬不毛小民完糧辦
差舍熬曬別無生路與山東梟匪大幫興販者不同此等窮民就
地取鹽餬口情甚可憫若概行禁絕必致激成事端盜賊蠭起是
以歷年以來該地方官僅能酌將硝池平毀未敢操切從事係爲
保全商民兼顧地方糧額起見且照章免參者實因商人無鹽運

往並非州縣督銷不力若補行題參各官必致藉口似非事理之
平應請仍行免參該司現核定各岸月銷引鹽成數通飭州縣營
按月造冊呈核如實在銷不足數卽融與暢岸代銷不准再任積
滯並督飭嚴整捕務妥爲緝禁稍私以冀漸有起色仍照道光二
十八年奏定章程如係商人無鹽運往州縣無憑督銷應罪坐商
人將州縣免其考核儼引地存鹽莫售查係州縣督銷不力卽將
該州縣隨案參處以期核實而昭公允至舊欠商課仍察看設法
催徵等情具詳前來臣查所詳均係實情復通盤籌計嘉慶以前
長蘆額引九十六萬六千餘道每引三百餘斤約其合三萬萬斤
今雖額引六十六萬二千餘道而每引五百數十斤約其合三萬
數千萬斤是應銷鹽數實較多於前矣從前每引課銀四錢數分
至五錢零其應徵課銀四十九萬餘兩今則每引課銀六錢數分

其應徵課銀及銅斤地租河工等項四十五萬餘兩又應徵軍需復價銀約二十萬兩榮工加價銀五萬兩雖有加價之名而商人賣鹽礙難照加否則官不敵私統計應徵銀約七十萬兩其攤賠各衙門帑利王范滿垣租息欽天監息款等項銀三十餘萬兩尙不在內是應徵銀數實加增於前矣銷數徵數既較舊制爲盈自應督飭運司仍就現在應行引鹽應徵課款隨時隨地設法整頓實力維持但期戶口增繁水旱不作冀可逐漸展舒免虧現額所有遵議辦理緣由理合據實覆陳伏乞

皇太后

皇上聖鑒敕部查照謹

奏

請撥江漢關洋稅摺

光緒十年六月十八日

奏為准軍月餉萬分支絀軍士懸釜待炊請將江漢關應解額款
於四六成洋稅項下通融勻撥以顧近畿要防恭摺仰祈
聖鑒事竊查准軍月餉專指江鄂各省關撥解別無來源其每月
應解銀數皆係欽奉

諭旨飭撥不惟延欠膜視本年四月戶部代催江海關應解淮餉
案內聲明淮軍七半駐紮直隸各海口拱衛

畿輔根本重地當此操防喫緊軍餉要需豈容一日缺乏應嚴飭
關道將現在應解月餉務須按月解清不惟絲毫延欠並將歷年
欠解銀兩竭力籌解等因咨行遵照在案茲查湖北江漢關每月
應解淮軍專餉四成洋稅銀二萬兩六成洋稅銀三萬兩其合五
萬兩四成項下之款已解至本年五月止六成項下之款則自上

年七月起至本年六月止欠至十三箇月之久合銀至三十九萬兩之多疊經臣咨行切催仍未報解據該關道惲彥琦稟稱因六成洋稅指撥繁多入不敷出異常竭蹶等情臣維軍餉爲計口授食要需誠如部議豈容一日缺乏況值法人構釁海防戒嚴畿輔根本重地尤關天下全局正督各軍實力操防嚴備戰守斷難枵腹荷戈惟江漢關所稟六成洋稅入不敷出自係實在情形若必責令於六成項下解足徒事迫呼仍無實濟查該關四成洋稅及五成二釐招商局稅爲數尙多同係該關之款應可通融勻撥值茲防務喫緊之際必須餉項及時籌給方足維繫軍心資以馳驅效命近因沿海各省辦防應解淮軍月餉報解益少來源枯竭後路轉運局僅存銀十餘萬兩不敷一月支放之用情形岌岌實爲向來所無臣責任要防莫名焦慮伏念他省請撥軍餉疊蒙

諭旨允准並撥部帑接濟誠以餉需爲軍士命脈勢不可緩朝廷慎重征防體恤士卒欽感同深近畿防務旣較他省尤重又處貧瘠之地並無別款可籌事機緊迫深恐貽誤惟有籲懇天恩俯念淮餉萬分支絀軍士懸釜待炊准將江漢關額撥六成洋稅項下月餉銀三萬兩嗣後如遇六成無款卽改撥四成洋稅及五成二釐招商局稅務須按月如數解足

敕下湖北督撫臣轉飭該關道遵照辦理不得再有延欠並將欠解上年七月至本年六月餉銀於四六成項下竭力通融勻撥迅速分批解濟以贍飢軍而維大局臣爲近畿要防待餉急切起見理合恭摺由驛瀝陳伏乞

皇太后

皇上聖鑒訓示施行謹

祭

祭稿五十一

五

查覆口外剿賊情形摺

光緒十年六月二十三日

奏爲遵查口外賊數無多圍場尙無裒脅之眾擬就已派各軍搜剿無須添撥兵隊前往恭摺覆陳仰祈

聖鑒事竊臣欽奉光緒十年六月初九日

寄諭開圍場竄賊裒脅日多恐致滋蔓著李鴻章迅卽飭屬偵探確切情形如該處兵力不敷剿辦卽由防所抽撥數營前往將此股匪徒趕緊撲滅不得稍涉遲延一面卽行奏聞等因欽此遵查蒙古克什克騰旗魚泡子地面游民聚眾滋事前據宣化鎮總兵王可陞及多倫廳協稟報卽派宣化練軍馬隊七哨古北口練軍步隊一營馬隊一哨馳往與多倫原有練軍馬隊一營分投剿辦並飭王可陞另帶隊伍出邊督辦已在經棚附近畢流溝一帶斃匪五百餘名續在三義泉青龍背坤兌川一帶斃匪一百六七十

名熱河等處官軍亦有擒斬並獲匪首暨由各地方官民剿獲匪黨多名其被脅之眾疊飭設法解散妥爲安撫餘匪似已無多惟各處未審賊情往往張大其詞探報未實宣化鎮王可陞老於兵事熟諳機宜現既親赴前敵當於奉

諭後飛飭審察各路確切情形酌度彼此形勢是否裹脅日眾現有各軍能否效用應否添撥數營妥細籌覆茲據王可陞稟稱此股匪徒起事原有圍場馬賊聞風竄出勾結裹脅遂致數日之內爲數逾千迨疊次擊斃解散除王端仁一股竄往蒙古游牧地面外其逃至圍場者僅有零匪該鎮接占北練軍營官參將許春浦函稱帶隊至圍場東北一帶搜查均無賊蹤現赴西圍搜查多倫廳亦有兵役前往協查尙無裹脅滋蔓之事至竄入藍旗游牧之王端仁一股除帶傷奔竄沿途擊斃外所餘無多前飭營官郭萬

隆譚興魁隨帶候糧跟蹤追勦該匪已由阿巴噶香臺地什巴爾
臺換馬至萬齊武王旗該旗與阿巴噶烏珠穆沁克什克
騰巴林四旗犬牙相錯其王公各不相屬亦不隸熱河察哈爾管
轄均不知集兵堵禦任賊游突搶奪我軍入旗遠追苦於地名譯
音無定雇覓蒙人引路則畏葸潛逃追逾數日馬力疲乏行糧告
罄又不便就食蒙古現探賊入烏珠穆沁界內已飭譚興魁率軍
截其東北之路並令郭萬隆及翼長羅大勝各帶隊伍分路兜勦
該鎮前因被裏飢民其情可憫若申痛勦之令轉恐安心爲盜固
結不解遂逐處出示曉諭解散現在反側漸消多倫白岔一帶雨
澤霽足秋稔可期擬俟王端仁一股剿滅酌留官兵彈壓巡緝不
必月添軍隊至匪目周沅得馬洛八張朋等犯訊據獲匪俱稱均
在王端仁股內接仗時曾有受傷逃散後存亡未卜其宋敬忠宋

學士二犯歷次獲匪均未供有其人諒係熱河員弁原探未確楊步瀝聞已逃往奉省陳瀟潰亦無其名容再確訪飭拏等情並據參將許春浦稟稱該將帶隊進圍查得東非一帶往年盤踞賊匪之木司土野豬窩灣灣溝亮兵臺紅石嶺等處均無賊蹤現往西圍搜查並據熱河道富華稟稱圍內匪徒業已逃竄其赤峯縣北路蘇塘等處並無餘匪至前次竄入豐甯縣大灘之賊曾獲溫翠淋等訊係王端仁股內旋卽西竄約計一百數十名經宣化等處官兵擒獲七八十名餘匪棄馬擲械逃竄現仍追拏等情前來臣查核王可陞等來稟大致相同現在賊數無多圍場亦尙無裒脅之眾前派去宣化古北口並多倫馬步練軍已有一千數百名又有熱河察哈爾官兵可敷兜截刻值海防喫緊本難抽撥前往自毋庸再行添派俾免兵多號令不一互相譟誤仍飭王可陞督率

所部迅將王端仁一股設法剿滅此外如有收匪潛遁亦卽會商各軍分投捕治勦撫兼施務將匪首王端仁周沅得等盡數擊散勿任餘燼復燃其圍場以內現經參將許春浦盤熱河練軍分路搜查應令實力妥辦惟圍場周圍千餘里地方空闊素爲盜匪出沒之區難保並無伏莽客軍僅能濟一時之急必須責成圍場同知營汛會同圍場總管設法布置防範隨時認真搜查巡緝庶足以杜亂萌至口外各屬客民多係直東無業之徒陸續前往或開墾荒地或小貿營生易於裹脅尤宜分別良莠妥爲安插不可使其失所或陵偏殘害轉致激而生事此次魚泡子之眾係因蒙古不令捕魚並殺斃多人遂積復仇爲名頓生變亂可爲前鑒昨新任熱河都統謙禧過津臣與商論及此謙禧擬俟到任後察核辦理其多倫各屬客民由臣督飭地方文武妥辦至王可陞解散舊

從逐處張貼告示保全頗眾謹將其告示錄呈

御覽仍令該鎮俟勦辦王端仁一股後再行察看情形將隊伍分別撤留所有口外無須添撥兵隊緣由理合恭摺由驛覆陳伏乞

皇太后

皇上聖鑒訓示謹

奏

廣陳商局輪船暫售美國局 光緒十年六月三十日

奏爲法人開辦商局輪船恐被劫奪經商董等密籌照西國通例暫售與美國旗昌洋商以保成本議明俟事定收回恭摺密陳仰

祈

聖鑒事竊臣接准總理衙門密電六月二十五日奉

旨從前設立招商局置買輪船係奏明辦理現聞售於美國李鴻章何以未經具奏殊屬非是海上轉運全恃輪船此舉自因恐爲法奪起見究竟是否出售抑暫行租給著據實奏聞並隨時酌奪情形設法收回欽此伏讀之下悚惕莫名臣查招商輪船局本仿西國公司之意雖賴官爲扶助一切張弛緩急事宜皆由商董經管至與外人交涉權變之處官法所不能繩者尙可援西例以相維持自本年閏五月開法酋統率兵艦來華恫喝肆擾海疆不靖

局勢曰非華商輪船二十餘艘駛行洋面日有戒心法人徧布謠言遇船劫奪船貨成本太重懼遭不測之險南北商旅咸以搭俄局船爲戒彼盡視招商局輪船與船政煤礦同深覬覦者也若轉運官物兵械等件既無鐵艦護持必爲敵船阻截即使假借他國之旗斷難冒險行駛若將船隻避泊口內局董唐廷樞又稱久停則船身機器必致傷損一切養船經費商力亦不能空賠於是滬上紳商私相籌議外洋商務皆惡律師主持遂密邀招商局索雇之英國公正律師旦文組查各國律例成案凡本國商船改換他國旗幟須在兩國未開衅以前黑海之戰俄商皆懸德美之旗有二艘換旗於戰事三日前遂爲法人所奪復有二艘易旗於戰前暗立俱同之據亦爲英國所奪布法之戰兩國商船多售與他國易旗駛行事後仍復原業若暫行租賃則非實在轉售他國必不

能保護此萬國通行之公例也先是唐廷樞在滬議交英商怡和洋行換旗代辦担文則謂英律煩苛難罄美律簡易易從美與中國交情較厚應換美旗爲妥適有美國旗昌行主願將招商局產悉照原值價銀五百二十五萬兩統歸該行認售該行以銀票如數抵給他日事定將銀票給還收回船棧權操自我仍可改換華旗道員馬建忠素習洋文熟諳公法前委赴滬會查招商局務該員就近與担文及旗昌反覆商論担文力保中法事定可以原價收回旗昌亦誓言決不失信故於價值亦不計較馬建忠偵知法事叵測遂毅然決然獨肩其責因與眾商定議訂立合同將各船棧暫交旗昌代爲經管換用美國旗幟照常駛行兩面所押契據銀行期票與收票按照西國律例均交律師担文收執日後藉以爲憑是戰前商船換旗出售爲各國常有之事中國雖屬創見而

眾商爲時勢所迫亦屬萬不得已至將來收回關鍵馬建忠惟担
文是問眾商惟馬建忠是問節節鈐制斷不容稍有反覆也當法
使議約未成之際軍書旁午臣雖知商船暫換美旗而未悉其詳
是以未遽入
告且此等事件華商與洋商交涉彼此全憑信義律師既援西例
擔保而官長卻未便主議外侮橫加商情惶迫數千人身家關係
而官無法以保護之更無力以賠償之商人自設法保全成本官
尤未便抑勒好在各省公款八十餘萬商本四百數十萬皆有著
落事竣可以操縱自如但冀法約早定船棧照議歸還中國商務
復興更無喫虧之處惟聞法人四處偵探總疑商局輪船並非實
售與美尙思援西例以乘間搜拏俾爲軍用美國官商亦惴惴焉
相與隱諱竭力保護此中機括尙求

聖明默鑒而出原之所有商局輪船暫售美商議明事定後收回各緣由謹由驛據實詳切密陳伏乞

皇太后

皇上聖鑒謹

奏

李文忠公奏稿卷五十一